

TITULUS XV.

De delictis venereis.

- | | |
|-----------------------------------|-------------------------------|
| I. Venereorum criminum species. | VI. Incestus. |
| II. & III. Poenæ fornicationis, & | VII. Sacrilegii. |
| concubinatus. | VIII. Raptus. |
| IV. Stupri. | IX. Sodomia, & concubitus cum |
| V. Adulterii. | bestiis. |

§. I.

Venereorum criminum species sunt fornicatio simplex, concubinatus, stuprum, adulterium, incestus, sacrilegium, raptus, sodomia, conjunctio cum bestiis, quæ vulgo *bestialitas* appellatur. Fornicatio est voluntarius concubitus viri cum muliere, qui duo inter se inire matrimonium possent, quoniam neuter alio vinculo obstrictus est. Concubinatus est conjunctio, seu consuetudo viri soluti, hoc est matrimonio non obligati, cum soluta item fœmina, quæ uxor. loco non est: stuprum vetita compressio virginis; adulterium alieni thori violatio (1); incestus conjunctio affinium, aut consanguineorum; sacrilegium concubitus cum persona, quæ se Deo vovit; raptus violenta abductio honestæ personæ libidinis explendæ causa (2). Sodomia est conjunctio duarum personarum ejusdem sexus, quæ sodomia perfecta dicitur, eam vero proxime sequitur sodomia imperfecta, quam admittunt duæ personæ dissimilis sexus, quæ corporum copulatione violarunt ordinem, quem liberorum procreandorum causa natura constituit. Denique est *bestialitas*, cum quis libidine sua bestias appetivit.

(1) Adulterium jure civili tantum in alienam conjugem l. 34. ff. ad l. Jul. de Adulter. ; jure vero canonico à marito alieno in quamlibet etiam innuptam fœminam committitur can. 13. 15. c. au. 32. qu. 5. Falso autem Cujacius in *Decretal.* c. 4. tit. 1. l. 1. opp. t. 6. col. 762. ed. Ven. reprehendit Alexandrum III., quod, ut ipse inquit, in c. 4. de jud. adulterium inter leviora crimina recensuit. Cujacium sequuntur hæretici complu-

res, quorum in Romanos Pontifices insigne odium est, atque inter eos Antonius Matthæus de crim. proleg. c. 6. eo usque impudentia progreditur, ut ad hoc vitium proclivem audacissime dicat sanctissimum Pontificem, cuius continentia omnibus monumentis testata est, ac ne in suspicione quidem adducta in eo diro, ac diuturne schismate, quo ipse vexatus fuit, opera præsertim Friderici I. Imperatoris, qui contra eum tres, aut quatuor, ut alii putant, Anti-Papas impense fovi. Sed impudentissimam calumiam invicta refutavit Carolus Blaschus *Diatrib.* 2. ad c. 4. de jud. inter ejus opuscul. canonic. Neapoli edita an. 1758. t. 1. p. 163. seq.

(2) De his, ceterisque criminibus, quorum hoc loco mentio est, copiose agit Renazzius *Instit. crimin.* l. 4. per tot.

§. II. Simplex fornicatio, præsertim clericorum, antiquis canonibus variis puniebatur poenis (1); nunc fere omnes judicis arbitrio relæctæ sunt. De concubinatu multa iure novo Concilii Tridentini (2) sapienter sunt constituta. Nimirum qui in ejus sceleris contagione versantur; ter ab Episcopo monendi, & si monitis non obediant, excommunicandi, aliisque etiam plectendi sunt poenis, cum per annum censuras neglexerunt. Concubinæ vero ab Episcopis ex officio graviter puniendæ sunt, atque extra oppidum, vel diocesim relegandæ.

(1) Canon Apostolicus 53. apud Cotelarium l. c. p. 450. , & Concilium Neocæsariense can. 9. t. 1. Concil. col. 1511. collect. Labbæi hujus criminis reos nunquam inter clericos cooptari, & cooptatos per ignorantiam offerendi munere privari voluerunt. Virginibus, quæ virginitatem suam non custodierint, poenitentiam imponit Concilium Liberitanum can. 14. col. 994. t. 1. Concil. collect. Labbæi.

(2) Concilium Tridentinum sess. 24. cap. 8. de Reform. matrim.

§. III. Clerici concubinarii, si nullum habeant beneficium, in carcera detruduntur, suspenduntur ab ordine, ab obtinendis in posterum beneficiis repelluntur, aliisque etiam, pro Episcopi arbitrio, & prudentia, criminisque natura poenis subjiciuntur. Clericus autem beneficiarius semel monitus, & in scelere perseverans privatur tertia parte fructuum beneficiorum, qui ab Episcopo Ecclesiæ, vel alteri pio loco adscribuntur. Si iterum monitus non resipiscat, cunctis privatur fructibus, atque etiam Episcopi arbitrio à beneficii administratione suspenditur; si neque his monitis pareat,

cuncta ei beneficia, & officia adimuntur, spesque omnis prædicetur aliorum in posterum obtinendorum; denique si nondum deserat pravum vitæ institutum, poena excommunicationis plectitur. Episcopus hujus criminis reus à provinciali Synodo monendus est, monita despiciens suspenditur, & adhuc flagitiose vivens à Summo Pontifice Episcopatu privatur (1).

(1) Concilium Tridentinum Sess. 25. c. 14. de Reform.

§. IV. Stuprum à Clerico illatum Ecclesiæ leges multant poena depositionis ab officio, & onere dotandi pueram, quæ vim passa est (1). Hodie præter dotationem, suspensio, multa pecuniaria, carcer etiam perpetuus, aliæque poenæ Episcopi arbitrio infliguntur. Laicus, qui hujusmodi crimen patravit, aut dotare, aut uxorem ducere debet mulierem, cum qua concubuit (2); nisi aliud status personarum, aut rerum conditio postulet, quia tunc pecunia dotis loco danda est. Verum qui mulierem compressit, data matrimonii fide, is eamdem fidem liberae omnino debet (3). Civiles leges capitis etiam condemnant hominem, qui mulierem per vim stupravit, præsttim valde honestam, aut pueram nondum maturam viro (4). Qui vim intulit, sed stuprum perficere non potuit, subest poenis, quæ judicis arbitrio infliguntur.

(1) C. 1. de Adulter. et stupr.

(2) In c. 1. cit. statuitur, ut qui stuprum intulit, utrumque præstet, scilicet & dotet, & uxorem ducat mulierem, cum qua concubuit. Verum Juris Canonici Interpretes conjunctivam particulam & disjunctive accipiunt, ut scilicet criminis reus alterutrum tantum præstare cogatur. Confer Fagnanum in c. 2. de Adulter. et stupr. n. 2. et 3., & Maschat. Instit. Canon. l. 5. tit. 16. n. 12.

(3) Consule Giraldum Exposit. jur. pontific. l. 5. tit. 16. sect. 834.

(4) L. 1. §. ult. ff. de Extraord. crim.

§. V. Adulterium à Jure Civili gladio (1), à Jure Canonico in laico excommunicatione, in clero depositione punitur (2), aut uterque certæ poenitentiae subjicitur (3)

Mulieres autem in monasterium ad perpetuam poenitentiam, si eas viri recipere noluerint, detruduntur (4). Hodie adulteri in carceres conjiciuntur, atque aliis subsunt poenis, quæ legibus, moribusque populorum receptæ sunt; & alicubi adulterium etiam morte multatur (5). Ubique tamen receptum est, ut propter adulterium perpetuum inter conjuges divortium fiat, uti demonstratum supra est.

(1) L. 30. Cod. ad L. Jul. de Adulter. , §. 4. Instit. de Publ. judic.

(2) Cap. 6. de Adulter. et stupr.

(3) Confer Basilius ep. canon. 1. ad Amphiloch. canon. 3. apud Labbæum t. 2. Concil. col. 1509. ed. Ven. Concilium Ancyranum can. 20. t. 1. col. 1494., Eliberitanum can. 64. et 69. t. eod col. 998. et 1000 Collect. Labbæi.

(4) Cap. 19. de Convers. conjug. Auth. Sed hodie, Cod. ad L. Jul. de Adulter.

(5) Confer Maschatum Inst. Jur. Canon. l. 5. tit. 16. n. 15. Huc etiam spectat Constitutio Ad compescendam 70. in Bullar. t. 4. part. 4. p. 267. quam contra adulteros, & adulteras. Itemque contra lenones & lenas. Sextus V. evulgavit.

§. VI. Adulterorum quoque poenis, aliisque gravioribus, aut levioribus, ut fert ratio criminis, & prudenteria judicis, plectuntur incesti, qui scilicet cum consanguineis, aut affinibus usque ad gradus prohibitos concubuerunt. Eodemque jure censentur, qui liberis dedere operam cum ea, quam de sacro fonte suscepérunt, vel in chrismate tenuerunt. Illud præterim est proprium incestus, quod qui eam sciens commisit cum conjugis consanguineis, conjugale debitum petere non potest (1).

(1) Cap. 1. & 4. De eo qui cognov. consing. in. uxor. In Urbe, atque in ecclesiastica ditione etiam ultimi supplicii poena in casibus quibusdam constituta est à Sexto V. Const. Volentes 80. t. 4. part. 4. Bullar. Roman. p. 294.

§. VII. Fornicatio clerici, qui in sacris ordinibus versatur, quamquam verum sit sacrilegium, tamen ut simplex fornicatio punitur. At sacrilegium cum moniali commissum gravio-

ri poenæ subjicitur. Num Jus civile hujus criminis reum morte multat, ejusque bona monasterio adscribit (1). Jure canonico laicus, qui monialem compressit, excommunicatur, clericus privatur beneficio, & depositus ab ordine in monasterium, seu potius in carcerem detruditur; ipsa vero monialis, quæ se violari passa est; aut in arctius monasterium, aut in carcerem conjicitur (2). Concubitus Christiani hominis cum Judæa, vel ethnica muliere, licet à simplici fornicatione non differat, plerumque tamen gravius punitur ob injuriam Christiano nomini illatam; ac si promissio accesevit matrimonii, etiam adulterii, non tamen capitis poena à Jure civili coeretur (3).

(1) L. 5. cod. de Episc. et cleric., Nov. 123. c. 43. Sed hodie criminosi bona heredibus relinqui solent Author. Bona cod. de Bon. proscript.

(2) Can. 6. 11. 25. 28. caus. 27. q. 1.

(3) L. 6. cod. de Judæis.

§. VIII. Raptore virginum, nisi assentiente puella crimen matrimonio purgetur, excommunicatione puniuntur; aut depositione, si clericus raptor fuerit (1). Raptore mulieris, quæ virum habet, subsunt poenis adulterorum, ac ceteris, quæ singularum gentium moribus receptæ sunt (2), sacrarum autem virginum, sive monialium raptore poenas perferunt, quæ à sacris Canonibus contra raptores simul, & sacrilegos sunt constitutæ (3). Jus Civile poena capitis animadvertisit in raptorem mulieris, præsertim nuptæ, & illius bona addicit ipsi mulieri, quæ raptæ est, modo ingenua, non ancilla, aut libertina sit (4).

(1) Can. 1. caus. 36. q. 2.

(2) Concilium Tridentinum sess. 24. c. 6. de Reform. matrim. plures constituit penas contra eos, qui matrimonii ineundi causa mulierem rapiunt. Verum hoc decretum non pertinere ad eos, qui ut suam expleant libidinem, raptum committunt, fere omnes sentiunt. Quare adversus eos obtinere debent penas, quæ gentium moribus, & legibus sunt constitutæ, quod recte observat Maschatus Institut. Jur. Canon. l. 5. tit. 17. n. 4.

(3) Can. 2. et seq. caus. 36. q. 2.

(4) L. un. cod. de Raptor. virg.

§. IX. Sodomia, & conjunctio cum bestiis non delicta sed monstra, & prodigia sunt. Olim quisquis tam fœda, & immania patrasset crimina, quæ contra naturam dicuntur, non solum à limine, verum etiam ab omni Ecclesiæ tecto removebatur (1). Hodie sodomia perfecta à Jure civili morte punitur, quæ poena ita exasperatur, ut infandi criminis rei vivi, vel saltem eorum cadavera igne comburantur (2). Jure canonico excommunicatio in laicum, in clericum vero depositio ab officio, beneficio, ordine clericali, & in monasterium detrusio constituta est (3). Eodem quoque modo puniuntur, qui sua cum bestiis corpora commiscuerunt.

(1) Tertullianus de Pudicit. c. 4. p. 517. ed. Rigaltii Paris. 1675. "Reliquas autem, inquit, libidinum furias & in corpora, & in sexus, ultræ juræ naturæ, non mode limine, verum omni Ecclesiæ tecto submovemus, quia non suat delicta, sed monstra." Atque hi sunt, quos hyemantes appellat Synodus Ancyranæ, qui ob criminis immanitatem ne digni quidem habebantur, qui locum obtinerent inter flentes, qui primus erat poenitentia gradus. Vide quæ scripsi l. 2. tit. 2. §. 74. not. 1. p. 130.

(2) L. 31. Cod. ad L. Jul. de Adulter. §. 4. Instit. de Publ. judic. Novell. 77. c. 1. l. 6. cod. Theod. ad L. Jul. de Adulter. quam legem integrum describit Auctor Collat. Mosaic. et Roman. leg. tit. 5. de Stu- pratoribus apud Schultingum Jurispr. veter. ante justinian. p. 753. ed. Lipsiae 1737.

(3) Cap. 4. de Exces. Prælat. Clerici, qui se spurcissimo criminis pluries inquinarunt, degradari, & curiæ seculari tradi debent, sicut demonstravi. l. 1. tit. 8. §. 23. p. 392.